

imeldahof

Imeldahof ta un di e organisacónnan social den Noord. Akinan algun souer y leidsternan ta guia y educa hobennan cu pa un o otro motibo no por risibi esaki na nan propio cas. Aunque ya nos a publica algo di Imeldahof den un edición anterior, toch nos lo bolbe conta algo di Imeldahof ya cu esaki ta cuadra cu nos topico di e edicion aki.

E hobennan cu por wordo admiti na Imeldahof ta esnan cu no tin mayornan mas y cu nan familiares no por cria nan. Tambe esnan cu pa un motivo financiero o algun otro motivonan no por keda cerca nan mayornan. Aya na Imeldahof nan ta wordo risibi pa algun souer y algun leidsternan. E personanan aki nan tarea ta pa guia e mucha y pa laga e mucha sintie manerá ta na su mes un propio cas e ta.

Edad di e hobennan cu ta quedando na Imeldhof ta varia di 3 pa 4 aña te ku 21 aña pa e hobencitanan y di 3 pa 4 aña te ku 10 aña pa e hobencitonan. Esaki ta debi cu no tin leidernan masculino pa guia e hobencitonan. Un leider masculino por comprende y resolve e problemanan di e hobencitonan mihor.

Actualmente ta asina ku e mucha muhernan cu alcanza 18 aña ta bandona Imeldahof pa bai traha o pa sigui studia o bai biba cerca familiaresnan. Pa e mucha hombernan ta un problema si nan alcanza na di diez aña ya cu no por keda na Imeldahof mas y no tin otro lugar pa pone nan aden. I na edad di diez aña ainda un mucha tin cu wordo guia y educa pa adulto-nan. Ta e deseo di e leidsternan, souernan y tambe gobierno pa traha un luga na unda e hobencitonan aki por biba aden, pero e problema ta cu no tin leidernan pa guia e hobencitonan aki. Asina ta cu casi semper nan mester bai biba cerca familiaresnan ku no por cria y educa e hobencitonan aki.

Awor nos ta bai conta loque e muchanan y nan leidsternan ta haciendo na Imeldahof. Mayoria di e muchanan ta bai school na playa o na Noord. E leidsternan ta keda pa cuida e luga y tambe pa repasa nan tarea pa e dia ey. Despues cu e muchanan regresa for di school nan ta laba paña, stofia cas cuida e jardin y algun otro trabou di cas. Den nan tempo liber nan ta bai traha obra di man, siña baila ballet, landa, hunga volleyball y demas actividadnan.

Fuera di e trabounan na Imeldahof e souernan tambe ta activo den e barionan di Noord. Den diferente bario nan a forma gruponan di hoben cu amicalmente ta discuti algun problema, actua den un toneel, studiando bijbel y algun otro actividadnan mas asina cu e hobennan por conoce otro y pa nan usa nan tempo liber util. Tambe un di e souernan ta dirigí e koor di Noord y ta duna les di cantamento. Tambe e

ancianonan no ta wordo lubida. Nan ta wordo juda den trahamento di obranan di man o ta wordo organiza algun fiesta pa nan. Tur esakinan den e club di Imeldahof, NOS CENTRO.

Nos ta spera cu nos por a logra di a informa nos lesadornan di e tantísimo importancia di Imeldahof pa nos comunidad. Tambe pa esaki sigui opera nos damanan mester tuma corage pa traha como leister na Imeldahof, y e caballeronan como leider. E hobennan mester di boso!!!



Tata di Noord 1976 ta bailando riba dia di tata na C.B.N. masha pabien Cheppi cu bo eligimento como tata di anja.